

REES, WILLIAM ('Gwilym Hiraethog'; 1802-1883), gweinidog Annibynnol, llenor, golygydd, ac arweinydd cymdeithasol

**Enw:** William Rees

**Ffugenw:** Gwilym Hiraethog

**Dyddiad geni:** 1802

**Dyddiad marw:** 1883

**Priod:** Ann Rees (née Edwards)

**Plentyn:** Anne Rees

**Plentyn:** Mary Rees

**Plentyn:** Henry Rees

**Rhiant:** Ann Rees

**Rhiant:** David Rees

**Rhyw:** Gwryw

**Galwedigaeth:** gweinidog Annibynnol, llenor, golygydd, ac arweinydd cymdeithasol

**Maes gweithgaredd:** Crefydd; Llenyddiaeth ac Ysgrifennu; Gwleidyddiaeth a Mudiadau Gwleidyddol; Argraffu a Chyhoeddi

**Awduron:** Thomas Eirug Davies, Robert Thomas Jenkins

Ganwyd yn Chwibrenisaf, fferm wrth droed Mynydd Hiraethog, plwyf Llansannan, sir Ddinbych, 8 Tachwedd 1802, ail fab Dafydd ac Ann Rees - ei frawd hyn oedd [Henry Rees](#), gweinidog amlwg gyda'r Methodistiaid Calфинаidd. Hanoedd ei daid ar ochr ei dad o Landeilo Fawr, ond o'r Wenvo, Morgannwg, y daeth yn gyllidydd i Lansannan, a phiodi Gwen Llwyd, etifeddes Chwibren-isaf, yn disgyn o Hedd Molwynog. Ychydig aeafau yn ysgol y pentref oedd yr unig addysg a gafodd, a throes i amaethu a bugeilio'n ifanc, ond ymroes i'w ddiwyllio'i hun, a than gyfarwyddyd Robert ap Dafydd o'r Gilfach Lwyd, hen lanc o amaethwr a chymydog iddo, dysgodd y gynghanedd, ac enillodd ar gywydd yn eisteddfod Aberhonddu yn 1826, i 'Buddugoliaeth Trafalgar a Marwolaeth y Penllywydd Nelson,' camp a'i dug i'r amlwg.

Magwyd ef gyda'r Trefnyddion Calфинаidd, ond derbyniwyd yn aelod gan yr Annibynwyr pan gychwynasant achos yn Llansannan yn 1828. Galwyd ef i bregethu'n fuan, ac aeth yn weinidog i Mostyn yn 1831. Symudodd i Lôn Swan, Dinbych, yn 1837, a daeth i fri mawr fel pregethwr. Yn 1843, aeth i'r Tabernacl, Lerpwl, yn olynydd i'w gyfaill [William Williams](#) o'r Wern, ac i Salem, yn yr un dref, yn 1853, a chodwyd capel Grove Street yn ei le yn 1867. Ymddeolodd yn 1875, gan drigo yng Nghaerhyd ei farw, 8 Tachwedd 1883; claddwyd yn Smithdown Road Cemetery, Lerpwl. Bu'n briod ag Ann Edwards (a fu farw 1874), Waunddilen, Nantglyn.

Arweiniai 'Hiraethog' yng ngwleidyddiaeth Cymru drwy'r Wasg ac oddi ar lwyfan. Cychwynwyd [Yr Amserau](#) yn Lerpwl yn 1843, ac ef yn olygydd hyd 1852. Hwn oedd y newyddiadur Cymraeg cyntaf i lwyddo. Rhoes 'Llythyrau'r Hen Ffarmwr' nerth i'w hoedl. Ymdrinient yn nhafodiaith henfro'r golygydd â phynciau fel crefydd a'r wladwriaeth, Deddfau'r Yd, addysg, Mudiad Rhydychen, a Phabyddiaeth. Radicaliaeth Lloegr a'i hysbrydolai'n bennaf. Deffrodd Gymru'n wleidyddol, ac i'r

*Amserau* y mae rhan helaetha'r diolch. Unwyd yr *Amserau* a'r [Faner](#) yn 1859. Rhod sylw helaeth i wleidyddiaeth Ewrop hefyd. Cefnogodd Mazzini a Garibaldi ym mrwydr rhyddid yr Eidal, a Kossuth yn Hwngari yn erbyn Awstria. Cyfarfu Hiraethog â Mazzini, a gohebai'r ddau â'i gilydd am ysbaid; a daeth dirprwyaeth o Hwngari i ddiolch iddo am ei gefnogaeth. Pleidiodd ryddhad y caethion yn America, yn bennaf drwy ei lyfr [Aelwyd Ffewythr Robert](#), a seiliwyd ar *Uncle Tom's Cabin*. Ef oedd 'tad' y ddarlith boblogaidd, a throes hi'n gyfrwng i ledaenu ei ffydd wleidyddol, ac i hyfforddi ar bynciau fel seryddiaeth, daeareg, a [Pantycelyn](#).

Y mae swm ei farddoniaeth yn enfawr. Cyhoeddodd *Gweithiau Barddonol Gwilym Hiraethog*, 1855, lle ceir ei awdl i 'Heddwch,' sy'n cynnwys y cywydd enwog i'r gof, a'r gân 'Atgofion Mebyd'; *Emmanuel*, i, 1862; ii, 1867, arwrgerdd hirfaith yn y mesur di-odl; *Twr Dafydd, sef Salmau Dafydd ar Gân*, 1875; [Cathlau Henaint](#), 1878. Ei emyn mwyaf adnabyddus yw 'Dyma gariad fel y moroedd.' Mewn rhyddiaith ceir [Helyntion Bywyd Hen Deiliwr](#), 1877 - cafwyd argraffiad newydd yn 1940; *Llythyrau'r Hen Ffarmwr*, 1878 - detholwyd o'r *Amserau*, caed detholiad arall yn 1939; *Cyfrinach yr Aelwyd*, 1878; *Cofiant y Parch. W. Williams o'r Wern*, 1842 - troed i'r Saesneg gan [J. R. Kilsby Jones](#) yn 1846; *Rhydd-weithiau Hiraethog*, 1872; Y Dydd Hwnnw, 1862, drama ar droad allan y ddwy fil yn 1662; *Darlithiau Hiraethog*, 1907. Ymhlith ei weithiau diwinyddol ceir *Y Cyfarwyddwr*, 1833, holwyddoreg ar brif bynciau'r ffydd Gristnogol; *Traethawd ar Grefydd Naturiol a Datguddiedig*, 1841; *Providence and Prophecy*, 1851; *Nodiadau ar yr Epistol at yr Hebraeid*, 1866; *Koheleth*, 1881, cyfrol o bregethau, ac ail eto yn 1910. Dyfarnwyd iddo yn 1882 fathodyn cyntaf Cymdeithas y Cymmrodorion, ond bu farw cyn ei dderbyn.

### HENRY REES (1837 - 1908), gweinidog

Mab William Rees. Dechreuodd bregethu yn 1856. Bu yn athrofa Aberhonddu (1859-1862), ac yna'n weinidog yng Nghaerlleon Fawr (1862-1885) a Bryngwran (Môn) o 1885 hyd ei ymddeoliad yn 1897. Bu farw 24 Chwefror 1908. Cyhoeddwyd cofiant iddo, gyda rhai o'i bregethau, gan R. P. Williams, yn 1909.

## Awduron

Y Parchedig Thomas Eirug Davies, (1892 - 1951)

Yr Athro Emeritus Robert Thomas Jenkins, (1881 - 1969)

## Ffynonellau

Thomas Roberts, David Roberts, [Cofiant y Parch. W. Rees, D.D. \(Gwilym Hiraethog\) \(Dolgellau 1893\)](#)

E. Rees, Elvet Lewis (gol.), *William Rees a Memoir*

*Hanes Eglwysi Annibynnol Cymru*, v, 407-12

*Y Gwyddoniadur Cymreig* (1889–96) (ail arg.), x, 799-811

*Welsh Religious Leaders in the Victorian Era* (Llundain 1905), 204-27

T. Eirug Davies, 'Cyfraniad Dr. William Rees (Gwilym Hiraethog) i Fywyd a Llên ei Gyfnod' (traethawd M.A. Prifysgol Cymru, 1931)

R. A. Johnson, adolygwyd gan Mari A. Williams, [Rees, William \[pseud. Gwilym Hiraethog\] \(1802–1883\)](#), *Oxford Dictionary of National Biography*, (cyrchwyd Hydref 2019)

R. Hughes, *Enwogion Môn / Anglesey worthies* (Bangor 1770)

[Marwolaeth y Parch Henry Rees](#), *Y Dysgedydd*, Ebrill 1908, tt.185-186

Ioan Anwyl, [Adgofion am y diweddar Barch Henry Rees, Bryngwran, Sir Fon, gynt o Gaerlleon](#), *Y Dysgedydd*, Gorphenaf 1909, tt.315-318

E. T. Jones, *Seren Gomer*, 1936, 151

## Darllen Pellach

R. Prytherch Williams, *Cofiant a phregethau y Parch. Henry Rees, Bryngwran, Môn* (Merthyr Tydfil 1909)

## Delweddau

John Thomas, [Rev. William Rees, 'Gwilym Hiraethog'](#)

John Thomas, [Gwilym Hiraethog](#)

John Thomas, [Dr. William Rees, 'Gwilym Hiraethog'](#)

John Thomas, [Y Parch. William Rees, D.D. \(Gwilym Hiraethog\)](#)

John Cochran, [Revd. William Rees Liverpool](#)

John Thomas, [Chwibren Isaf, Llansannan, old home of Henry & William Rees](#)

## Dolenni Ychwanegol

VIAF: [51286705](#)

Wikidata: [Q8017443](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

